

সব শিক্ষাপ্রতিষ্ঠানে নতুন নির্দেশনা দিয়ে মাউশির চিঠি

অনলাইন ডেস্ক



ফাইল ছবি

জুলাই গণ-অভ্যুত্থান বর্ষপূর্তি উপলক্ষে শিক্ষাপ্রতিষ্ঠানে ‘২৪-এর রঙে গ্রাফিতি ও চিত্রাঙ্কন প্রতিযোগিতা’ বাস্তবায়ন ও মূল্যায়ন কমিটি গঠন নিয়ে নতুন নির্দেশনা দিয়েছে মাধ্যমিক ও উচ্চ শিক্ষা অধিদপ্তর (মাউশি)। এই প্রতিযোগিতা বাস্তবায়ন ও মূল্যায়নে মহানগর, জেলা, উপজেলা ও বিভাগীয় পর্যায়ে ৭ সদস্যের কমিটি করতে বলা হয়েছে।

গতকাল রবিবার মাধ্যমিক ও উচ্চ শিক্ষা অধিদপ্তরের এক চিঠিতে এ তথ্য জানানো হয়েছে। প্রতিষ্ঠান প্রধান ও সংশ্লিষ্টদের কাছে চিঠি পাঠানো হয়েছে।

আগামী আগস্ট মাসের শুরুতে অনুষ্ঠিতব্য এই প্রতিযোগিতায় অংশ নিতে পারবে দেশের সব মাধ্যমিক ও উচ্চ মাধ্যমিক স্তরের

শিক্ষার্থী। আর এতে অংশ নিয়ে জাতীয় পর্যায়ে উত্তীর্ণ হলে মিলবে ৫ লাখ টাকার পুরস্কার।

চিঠিতে বলা হয়েছে, উপজেলা ও মহানগর পর্যায়ের কমিটি ১৫ থেকে ১৭ জুলাইয়ের মধ্যে প্রতিযোগিতা শেষ করবে। বিজয়ী ও প্রতিষ্ঠানের নাম জেলা কমিটির কাছে পাঠাবে।

জেলা কমিটি ১৯ থেকে ২০ জুলাইয়ের মধ্যে প্রতিযোগিতা শেষ করে বিজয়ী ও প্রতিষ্ঠানের নাম বিভাগীয় কমিটির কাছে পাঠাবে। বিভাগীয় পর্যায়ের কমিটি ২২ থেকে ২৩ জুলাইয়ের মধ্যে প্রতিযোগিতা শেষ করে বিজয়ী ও প্রতিষ্ঠানের নাম কেন্দ্রীয় কমিটির কাছে পাঠাবে।

বিজয়ীদের গ্রাফিতি চিত্রাঙ্কন প্রতিযোগিতার ফল প্রকাশের পর (julyforever.gov.bd) ওয়েবসাইটে আপলোড করা হবে।

আয়োজনকে আরো উৎসাহব্যাঞ্জক করতে পুরস্কারের ব্যবস্থা রেখেছে সরকার।

উপজেলা বা থানা পর্যায়ে প্রথম পুরস্কার ৭ হাজার টাকা, দ্বিতীয় পুরস্কার ৫ হাজার টাকা এবং তৃতীয় পুরস্কার ৩ হাজার টাকা। জেলা পর্যায়ে প্রথম পুরস্কার ১০ হাজার, দ্বিতীয় ৭ হাজার এবং তৃতীয় ৫ হাজার টাকা। বিভাগীয় পর্যায়ে প্রথম পুরস্কার ৩ লাখ, দ্বিতীয় ২ লাখ এবং তৃতীয় ১ লাখ টাকা।

সবশেষে জাতীয় পর্যায়ে একটি মাধ্যমিক এবং একটি উচ্চ মাধ্যমিক শিক্ষাপ্রতিষ্ঠানকে চূড়ান্তভাবে নির্বাচিত করে প্রতিটিকে দেওয়া হবে ৫ লাখ টাকা পুরস্কার। এ ছাড়াও প্রতিযোগিতা আয়োজনে উপজেলা পর্যায়ে ৩০ হাজার টাকা, জেলা পর্যায়ে ৫০ হাজার এবং বিভাগীয় পর্যায়ে ৫০ হাজার টাকা বরাদ্দ দেওয়া হয়েছে।